

瀛馬驤重溥張鴻昌王安仁蔡寶義魯清源王舉之楊槐柱等十名擬請照章獎給優貢取列中等張書紳張大成賈又新王家賓張應庚李清程嘉綏吳世慶李含芳謝池徐煥章田明彝王祖培呂積慶劉炳田樹楷王秉謙柳貴本林柏鈺張錫甲李呈材熊泉王壽圖吳光黼張嘉譽傅巖孟懷清王鴻遇張宮鼎李宇澄秦德琮等三十一名擬請照章獎給歲貢其列入下等胡緒文馮龍驤二名擬請照章作爲優廩生如蒙 俞允卽由 臣部行知該撫遵辦所有遵議陝西高等學堂第二次補習中學畢業獎勵緣由謹恭摺具陳伏乞 皇上聖鑒謹 奏
宣統二年十二月二十六日奉 旨依議欽此

直隸總督陳夔龍奏驛傳事務改歸勸業道管理片

再查憲政編查館奏定考核直省勸業道官制細則摺內載驛傳一節嗣後按察使改爲提法使時應將驛傳事務劃歸該道管理等語查直隸按察使業於上年七月間改補提法使所有驛傳事務自應遵章移歸勸業道管理前經法部附奏奉 旨該部知道欽此咨行到直由 臣轉行該司道遵照在案茲據勸業道孫多森詳稱准提法使齊耀琳將驛傳卷宗並經費銀兩移交該道於宣統二年十二月十三日接收管理等情奏咨前來除分咨陸軍部法部郵傳部農工商部查照外理合附片具陳伏乞 聖鑒謹 奏宣統三年正月十九日奉 硃批該部知道欽此

●又奏委檢討唐寶鐸等赴憲政編查館改訂官制片 再 臣欽奉 上諭現在釐訂外省官制著派錫良陳夔龍張人駿瑞澂會同憲政編查館王大臣悉心參酌等因欽此自應欽遵查照惟查改訂外省官制事務繁重亟應遴派明白通達之員前赴憲政編查館稟陳接洽以

期隨時電商查有前翰林院檢討唐寶鐸直隸補用道汪士元直隸存記道沈銘昌堪以派委除分別飭遵并咨憲政編查館查照外理合附片具陳伏乞 聖鑒謹 奏宣統三年正月十九日奉 硃批憲政編查館知道欽此

湖廣總督瑞澂奏款提費紬關係學務興廢懇 恩飭部緩提要政加價摺

奏爲款提費紬關係湖北全省學務興廢懇 恩飭部緩提專摺摺陳仰祈 聖鑒事竊

臣於本年六月准度支部電要政加價一款應以四分之一充辦學費餘須儘數撥作賠款等因臣以此時財政支絀內外俱困部臣移緩就急實具苦心適值試辦宣統三年預算比即督同藩司恪遵辦理旋據前任藩司王乃徵詳陳清冊擬減教育費三十五萬三千八百兩臣以該藩司綜理財政見聞或確隨卽據冊辦理時前任提學司高浚爵亦頗力爭臣尙不以爲然蓋鄂省預算不敷已及二百萬若不從裁節入手收支適合將益無望此臣毅然爲之而不恤也業將原冊咨部核辦仍遵章將地方行政經費清冊交湖北諮議局議決嗣據諮議局呈稱湖北教育經費以一百萬兩計算除各廳州縣二十餘萬又出洋留學生經費三十萬其實用於省城中等以上暨各專門學堂者不過四十餘萬兩今部飭提要政加價之款至三十餘萬兩則所餘者不及十萬自今以往非獨教育不能普及所有從前已成學堂均將停閉當此預備立憲崇尚教育時代似無如此辦法查東西各國皆有國家稅地方稅鹽釐固屬國家正稅要政加價則加諸正稅之外原奏指定專歸本省四項要政之用是有此加價卽當用諸本省要政衡之法理乃得其平且鄂民食鹽負擔不爲不重如宜昌川鹽江防加價宜昌川鹽籌餉加價練兵新餉抵補藥稅軍艦經費淮鹽江淮加價練餉加價名目一加再加大抵皆有義務